

Nóc wujednanja w Różeńce

Wšitcy wěriwi, hač mužojo abo žony, młodzi abo stari, su sobotu, 29. měrca, do Róžeńčanskeje swjatnicy na nóc wujednanja přeprošeni. Serbscy młodostni ju wuhotuja. Nóc wujednanja započnje so w 20.00 hodž. z nyšporom a wustajenjom Najswjećišeho a skónči so z Božej mšu w 23.00 hodž.

W běhu wječora změja wěriwi składnosć, so modlić, na hudźbu sluchać abo ćicho wo sebi rozpomi-
nać a na Boha sluchać. Zdobom změja zamołwići wšelake stacije spřihotowane, mjez druhim im-
puls k temje „Što je nadźija? Štó abo

što da mi nadźiju?“ kaž tež roz-
mołwne koło z cistercienskami
klóštra Marijineje hwězdy.

Na administraturje budžetaj
Halina a Chrystofer Wjenka

w 20.30 a 21.30 hodž. wo zmysle

mandželstwa kaž tež wšelakich dimensijach lubo-
sće pod heslom „Čehodla so hišće zmandželić?

Teologija mandželstwa a wosobinske swědčenje“
přednošować. Zdobom móža wěriwi list na Boha
pisać, próstwu a džak zwuraznić a k sakramentej
wujednanja, swjatej spowědži, přistupić, abo wo
duchownu rozmołwu prosyć.



Kóždemu samomu je přewostajene, kak sej wječor
časowje zarjaduje. To rěka, zo je móžno přez cyły
čas přitomny być abo po swojim dobrozdaću přińć
abo woteńć. Do Božeho domu zastupić budže jenož
přez zadni zachod móžno. Cyrkej budže tepjena.